

श्रीः
श्रीमते रामानुजाय नमः
श्रीमते निगमान्तमहादेशिकाय नमः

कृष्णयजुर्वेदीय तैत्तिरीय ब्राह्मणे
॥ प्रथमाष्टके चतुर्थः प्रश्नः ॥

This document has been prepared by

Sunder Kidāmbi

with the blessings of

श्री रङ्गरामानुज महादेशिकन्

His Holiness śrīmad āṇḍavan śrīraṅgam

श्रीः
श्रीमते रामानुजाय नमः
श्रीमते निगमान्तमहादेशिकाय नमः
॥ प्रथमाष्टके चतुर्थः प्रश्नः ॥

हरिः ओ(४)म्।
उभये वा एते प्रजापतेरध्यसृज्यन्त।
देवाश्चासुराश्च।
तान्न व्यजानात्।
इमेऽन्य इमेऽन्य इति।
स देवान्गुं शूनकरोत्।
तानभ्यषुणोत्।
तान्पवित्रेणापुनात्।
तान्प्रस्तात्पवित्रस्य व्यगृह्णात्।
ते ग्रहा अभवन्।
तद्ग्रहाणां ग्रहत्वम् ॥ 1 ॥
देवता वा एता यजमानस्य गृहे गृह्यन्ते।
यद्ग्रहाः।
विदुरेनं देवाः।
यस्यैवं विदुषं एते ग्रहा गृह्यन्ते।
एषा वै सोमस्याहुतिः।

Please let us know of any errors in this text.

यदु॑पा॒गुं॒शुः।

सोमे॑न दे॒वाग्स्त॑र्पया॒णीति॒ खलु॒ वै सोमे॑न यजते।

यदु॑पा॒गुं॒शुं जु॒होति॑।

सोमे॑नै॒व तद्दे॒वाग्स्त॑र्पयति।

यद्ग्र॑हाञ्जु॒होति॑ ॥ 2 ॥

दे॒वा ए॒व तद्दे॒वान्गच्छ॑न्ति।

यच्च॑म॒साञ्जु॒होति॑।

तेनै॒वानु॑रूपेण॒ यज॑मानः सुव॒र्गं लो॒कमे॑ति।

किं न्वे॑तदग्रं आसी॒दित्या॑हुः।

यत्पा॑त्रा॒णीति॑।

इ॒यं वा ए॒तदग्रं॑ आसीत्।

मृ॒न्मया॑नि॒ वा ए॒तान्या॑सन्।

तैर्दे॒वा न व्या॒वृत॑मगच्छन्।

त ए॒तानि॑ दा॒रुमया॑णि॒ पात्रा॑ण्यपश्यन्।

तान्य॑कुर्वत ॥ 3 ॥

तैर्वै॑ ते व्या॒वृत॑मगच्छन्।

यद्दा॑रु॒मया॑णि॒ पात्रा॑णि॒ भव॑न्ति।

व्या॒वृत॑मे॒व तैर्य॑ज॒मानो॑ गच्छति।

यानि॑ दा॒रुमया॑णि॒ पात्रा॑णि॒ भव॑न्ति।

अ॒मुमे॒व तैर्लो॒कम्भि॑जयति।

यानि॑ मृ॒न्मया॑नि।
 इ॒ममे॒व तैर्लो॒कम॒भिज॑यति।
 ब्र॒ह्मवा॒दिनो॑ वदन्ति।
 काश्च॑त॒स्रः स्था॒लीर्वा॑य॒व्याः सोम॒ग्रह॑णी॒रिति॑।
 दे॒वा वै पृ॑श्नि॒मदु॑हन् ॥ 4 ॥

तस्या॑ ए॒ते स्तना॑ आसन्।
 इ॒यं वै पृ॑श्निः।
 तामा॑दि॒त्या आ॑दि॒त्यस्था॒ल्या
 चतु॑ष्पदः प॒शून् दु॑हन्।
 यदा॑दि॒त्यस्था॒ली भव॑ति।
 चतु॑ष्पद ए॒व तया॑ प॒शून् यज॑मान इ॒मां दु॑हे।
 तामिन्द्र॑ उक्थ्यस्था॒ल्येन्द्रि॒यम॑दुहत्।
 यदु॑क्थ्यस्था॒ली भव॑ति।
 इन्द्रि॒यमे॒व तया॑ यज॑मान इ॒मां दु॑हे।
 तां विश्वे॑दे॒वा आ॑ग्रयणस्था॒ल्योर्ज॑मदुहन्।
 यदा॑ग्रयणस्था॒ली भव॑ति ॥ 5 ॥

ऊ॒र्जमे॒व तया॑ यज॑मान इ॒मां दु॑हे।
 तां म॑नु॒ष्या ध्रु॑वस्था॒ल्याऽऽयु॑रदुहन्।
 यद्ध्रु॑वस्था॒ली भव॑ति।
 आयु॑रे॒व तया॑ यज॑मान इ॒मां दु॑हे।

स्था॒ल्या गृ॒ह्णाति॑ ।
वा॒य॒व्ये॑न जुहोति ।
तस्मा॑द॒न्येन॒ पात्रे॑ण प॒शून्द्दु॑हन्ति ।
अ॒न्येन॒ प्रति॑गृह्णन्ति ।
अथो॑ व्या॒वृ॒त॒मे॒व तद्य॑ज॒मानो गच्छ॑ति ॥ 6 ॥

ग्र॒ह॒त्वं ग्र॒हाञ्जु॑होत्य॒कुर्व॑तादुहन्नाग्रयणस्था॒ली
भव॑न्ति नव॑ च ॥ 1 ॥

यु॒व॒ग्ं सु॒राम॑मश्विना ।
नमु॑चावाऽसुरे सचा॑ ।
वि॒पि॒पा॒ना शु॑भस्पती ।
इन्द्रं॑ कर्मस्वावतम् ।
पु॒त्रमि॑व पि॒तरा॑वश्विनो॒भा ।
इन्द्रा॑व॒तं क॑र्मणा द॒गुं॑सना॒भिः ।
यथ्सुरा॑मं व्यपि॑बः शची॑भिः ।
सर॑स्वती त्वा मघवन्नभीष्णात् ।
अहा॑व्यग्ने ह॒विरा॒स्ये॑ ते ।
सु॒ची॑व॒ घृ॒तं च॒मू इ॒व सोमः॑ ॥ 7 ॥

वा॒ज॒स॒नि॒ग्ं र॒यि॒म॒स्मे सु॒वीर॑म् ।
प्र॒श॒स्तं धै॑हि य॒शसं॑ बृहन्त॑म् ।
यस्मि॑न्नश्वास ऋष॒भासं॑ उ॒क्षणः॑ ।

व॒शा मे॒षा अ॑वसृ॒ष्टास॒ आहु॑ताः।
 की॒ला॒ल॒पे सोम॑पृ॒ष्ठाय॒ वेध॑सै॑।
 हृ॒दा म॒तिं ज॑नय॒ चारु॑म॒ग्रयै॑।
 ना॒ना हि वा॑ दे॒वहि॑त॒गुं स॒दो मि॒तम्।
 मा स॑ग्सृ॒क्षाथां॑ पर॒मे व्यो॑मन्।
 सुरा॒ त्वमसि॑ शु॒ष्मिणी॒ सोम॑ ए॒षः।
 मा मा॑ हि॒गंसीः॒ स्वां योनि॑मावि॒शन् ॥ ८ ॥

यद॑त्र शि॒ष्टगुं॑ र॒सिनः॑ सु॒तस्य॑।
 यदिन्द्रो॒ अपि॑ब॒च्छर्ची॑भिः।
 अ॒हं तद॑स्य॒ मन॑सा शि॒वेन॑।
 सोम॑गुं॒ राजा॑नमि॒ह भ॑क्षयामि।
 द्वे स्रु॒ती अ॑शृणवं॒ पितृ॑णाम्।
 अ॒हं दे॒वाना॑मु॒त म॒र्त्याना॑म्।
 ताभ्या॑मि॒दं विश्वं॑ भुव॒नगुं॑ समे॒ति।
 अ॒न्तरा॑ पूर्॒वम॑परं च के॒तुम्।
 यस्ते॑ दे॒व वरु॑ण गाय॒त्रच्छ॑न्दाः पाशः।
 तं तं॑ ए॒तेनाव॑यजे ॥ ९ ॥

यस्ते॑ दे॒व वरु॑ण त्रि॒ष्टुच्छ॑न्दाः पाशः।
 तं तं॑ ए॒तेनाव॑यजे।
 यस्ते॑ दे॒व वरु॑ण॒ जग॑तीछन्दाः पाशः।

तं तं ए॒तेना॑व॒यजे॑ ।
सोमो॑ वा ए॒तस्य॑ रा॒ज्यमा॑द॒त्ते ।
यो राजा॑ स॒न्ना॒ज्यो वा॑ सोमै॒न॒ यज॑ते ।
दे॒व॒सु॒वामे॑तानि॑ ह॒वीग॑ंषि॑ भवन्ति ।
ए॒ताव॑न्तो॒ वै दे॒वाना॑ग्ं स॒वाः ।
त ए॒वास्मै॑ स॒वान्प्रय॑च्छन्ति ।
त ए॒नं पुनः॑ सुवन्ते रा॒ज्याय॑ ।
दे॒व॒सू राजा॑ भवति ॥ 10 ॥

सोमं॑ आवि॒शन् य॑जे रा॒ज्यायै॑कं च ॥ 2 ॥

उद॑स्थाद्दे॒व्यदि॑तिर्वि॒श्वरू॑पी ।
आयु॑र्य॒ज्ञप॑तावधात् ।
इन्द्रा॑य कृण्व॒ती भा॒गम् ।
मि॒त्राय॑ वरु॒णाय॑ च ।
इ॒यं वा अ॑ग्निहो॒त्री ।
इ॒यं वा ए॒तस्य॑ नि॒षीद॑ति ।
यस्या॑ग्निहो॒त्री नि॒षीद॑ति ।
तामु॑त्थापयेत् ।
उद॑स्थाद्दे॒व्यदि॑तिरि॒ति ।
इ॒यं वै दे॒व्यदि॑तिः ॥ 11 ॥

इ॒मामे॒वास्मा॒ उत्था॑पयति।
 आयु॑र्य॒ज्ञप॑तावधा॒दित्या॑ह।
 आयु॑रे॒वास्मि॑न्दधाति।
 इन्द्रा॑य कृ॒ण्वती॒ भा॒गं मि॒त्राय॒
 वरु॑णाय॒ चेत्या॑ह।
 य॒था य॒जुरे॒वैतत्।
 अ॒व॒र्ति॒ वा ए॒षैतस्य॑ पा॒प्मानं॑
 प्रति॒ख्याय॒ निषी॑दति।
 यस्या॑ग्नि॒होत्र्यु॑प॒सृष्टा नि॒षीद॑ति।
 तां दु॒ग्ध्वा ब्रा॑ह्म॒णाय॑ दद्यात्।
 यस्या॑न्नं॒ नाद्यात्।
 अ॒व॒र्ति॒मे॒वास्मि॑न्पा॒प्मानं॑ प्रति॒मुञ्च॑ति ॥ 12 ॥

दु॒ग्ध्वा द॑दाति।
 न ह्यदृ॑ष्टा॒ दक्षि॑णा दी॒यते॑।
 पृथि॒वीं वा ए॒तस्य॒ पयः॒ प्रवि॑शति।
 यस्या॑ग्नि॒होत्रं॒ दुह्य॑मान॒ग्ग् स्क॑न्दति।
 यद॒द्य दु॒ग्धं पृथि॒वीम॑स॒क्त।
 यदोष॑धीर॒प्यस॑र॒द्यदा॑पः।
 पयो॑ गृ॒हेषु॒ पयो॑ अ॒घ्निया॑सु।
 पयो॑ व॒त्सेषु॒ पयो॑ अस्तु॒ तन्मयी॑त्याह।

पयं ए॒वात्म॑न्गृ॒हेषु॑ प॒शुषु॑ धत्ते।
अ॒प उप॑सृजति ॥ 13 ॥

अ॒द्भिरे॒वैन॑दाप्रोति।
यो वै य॒ज्ञस्या॑र्ते॒नाना॑र्त॒गं स॑गंसृजति।
उ॒भे वै ते त॑र्ह्यार्छ॒तः।
आ॒र्छति॑ खलु वा ए॒तद॑ग्निहो॒त्रम्।
यद्बु॒द्ध्यमा॑न॒ग्ं स्क॑न्दति।
यद॑भिदुह्यात्।
आ॒र्ते॒नाना॑र्तं य॒ज्ञस्य॑ स॒गंसृ॑जेत्।
तदे॒व या॒दृक्की॒दृक्च॑ हो॒तव्य॑म्।
अथा॒न्यां दु॒ग्ध्वा पु॑नर्हो॒तव्य॑म्।
अना॑र्ते॒नैवा॑र्तं य॒ज्ञस्य॑ निष्क॑रोति ॥ 14 ॥

यद्यु॒द्धु॑तस्य॒ स्कन्दे॑त्।
यत्ततोऽ॒हु॑त्वा पु॒नरे॒यात्।
य॒ज्ञं वि॒च्छि॑न्द्यात्।
यत्र॒ स्कन्दे॑त्।
तन्नि॒षद्य॒ पुन॑र्गृ॒हीया॑त्।
यत्रै॒व स्क॑न्दति।
तत॑ ए॒वैन॑त्पुन॑र्गृ॒ह्णाति॑।
तदे॒व या॒दृक्की॒दृक्च॑ हो॒तव्य॑म्।

अथान्यां दुग्ध्वा पुनर्होतव्यम्।
अनार्तेनैवार्तं यज्ञस्य निष्करोति ॥ 15 ॥

विवा एतस्य यज्ञश्छिद्यते।
यस्याग्निहोत्रेऽधिश्रिते श्वाऽन्तरा धावति।
रुद्रः खलु वा एषः।
यदग्निः।
यद्गामन्वत्यावर्तयेत्।
रुद्राय पशूनपिदध्यात्।
अपशुर्यजमानः स्यात्।
यदपोऽन्वतिषिञ्चेत्।
अनाद्यमग्नेरापः।
अनाद्यमाभ्यामपिदध्यात्।
गार्हपत्याद्भस्मादायं।
इदं विष्णुर्विचक्रम इति
वैष्णव्यर्चाऽऽहवनीयाद्ध्वगंसयन्नुद्रवेत्।
यज्ञो वै विष्णुः।
यज्ञेनैव यज्ञं सन्तनोति।
भस्मना पदमपिवपति शान्त्यै ॥ 16 ॥

वै देव्यदितिर्मुञ्चति सृजति करोति करोत्याभ्यामपि -
दध्यात्पञ्च च ॥ 3 ॥

निवा ए॒तस्या॑ह॒वनी॒यो गार्ह॑पत्यं कामयते।
 नि गार्ह॑पत्य आह॒वनी॒यम्।
 यस्या॒ग्निम॑नु॒द्धृत॑गुं सूर्यो॒ऽभिनि॒म्रोच॑ति।
 दर्भेण॑ हिर॑ण्यं प्र॒बध्य॑ पुरस्ता॑द्धरेत्।
 अथा॒ग्निम्।
 अथा॑ग्निहोत्रम्।
 यद्धिर॑ण्यं पुरस्ता॑द्धरति।
 ज्योति॑र्वै हिर॑ण्यम्।
 ज्योति॑रे॒वैनं॑ पश्य॒न्नुद्ध॑रति।
 यद्दग्निं॑ पूर्॒वगुं॑ हर॒त्यथा॑ग्निहोत्रम् ॥ 17 ॥

भा॒ग॒धेये॑नै॒वैनं॑ प्रणयति।
 ब्रा॒ह्म॒ण आ॑र्षे॒य उद्ध॑रेत्।
 ब्रा॒ह्म॒णो वै सर्वा॑ दे॒वताः॑।
 सर्वा॑भिरे॒वैनं॑ दे॒वता॑भि॒रुद्ध॑रति।
 अ॒ग्नि॒हो॒त्रमु॑प॒साद्या॑तमि॒तोरा॑सीत।
 व्र॒तमे॒व ह॒तम॑नु॒म्रिय॑ते।
 अन्तं॑ वा ए॒ष आ॒त्मनो॑ गच्छति।
 यस्ता॑म्यति।
 अन्तं॑मेष य॒ज्ञस्य॑ गच्छति।
 यस्या॒ग्निम॑नु॒द्धृत॑गुं सूर्यो॒भिनि॒म्रोच॑ति ॥ 18 ॥

पुनः॑ स॒मन्यं॑ जु॒होति॑ ।
 अन्ते॑नै॒वान्तं॑ य॒ज्ञस्य॑ निष्क॑रोति ।
 वरु॑णो वा ए॒तस्य॑ य॒ज्ञं गृ॑ह्णाति ।
 यस्या॒ग्निमनु॑द्धृ॒तगुं॑ सू॒र्यो॒भिनि॒म्रोच॑ति ।
 वा॒रुणं॑ च॒रुं निर्व॑पेत् ।
 तेनै॒व य॒ज्ञं निष्क्री॑णीते ।
 नि वा ए॒तस्या॑ह॒वनी॒यो गार्ह॑पत्यं कामयते ।
 नि गार्ह॑पत्य आह॒वनी॒यम् ।
 यस्या॒ग्निमनु॑द्धृ॒तगुं॑ सू॒र्योऽभ्यु॑देति ।
 च॒तुर्गृ॑ही॒तमाज्यं॑ पु॒रस्ता॑द्धरेत् ॥ 19 ॥

अथा॒ग्निम् ।
 अथा॑ग्नि॒होत्र॑म् ।
 यदाज्यं॑ पु॒रस्ता॑द्धरति ।
 ए॒तद्वा अ॒ग्नेः प्रि॒यं धाम॑ ।
 यदाज्यं॑म् ।
 प्रि॒येणै॒वैनं॑ धाम्ना॒ सम॑र्धयति ।
 यद्दग्निं॑ पूर्॒वगुं॑ ह॒रत्यथा॑ग्नि॒होत्र॑म् ।
 भा॒गधे॒येनै॒वैनं॑ प्रणयति ।
 ब्रा॒ह्मण॑ आ॒र्षेय॑ उद्धरेत् ।
 ब्रा॒ह्मणो॑ वै सर्वा॑ दे॒वताः॑ ॥ 20 ॥

सर्वाभिरेवैनं देवताभिरुद्धरति।
 पराची वा एतस्मै व्युच्छन्ती व्युच्छति।
 यस्याग्निमनुद्धृतं सूर्योऽभ्युदेति।
 उषाः केतुना जुषताम्।
 यज्ञं देवेभिरिन्वितम्।
 देवेभ्यो मधुमत्तमग्ं स्वाहेति
 प्रत्यङ्घ्रिषद्याज्येन जुहुयात्।
 प्रतीचीमेवास्मै विवासयति।
 अग्निहोत्रमुपसाद्यातमितोरासीत्।
 व्रतमेव हतमनु म्रियते।
 अन्तं वा एष आत्मनो गच्छति ॥ 21 ॥

यस्ताम्यति।
 अन्तमेष यज्ञस्य गच्छति।
 यस्याग्निमनुद्धृतं सूर्योऽभ्युदेति।
 पुनः समन्यं जुहोति।
 अन्तैर्नैवान्तं यज्ञस्य निष्करोति।
 मित्रो वा एतस्य यज्ञं गृह्णाति।
 यस्याग्निमनुद्धृतं सूर्योऽभ्युदेति।
 मैत्रं चरुं निर्वपेत्।

तेनैव य॒ज्ञं निष्क्री॑णीते।

यस्या॑ह॒वनी॒येऽनु॑द्वाते॒ गार्ह॑पत्य उ॒द्वाये॑त् ॥ 22 ॥

यदा॑ह॒वनी॒यम॑नु॒द्वाप्य॒ गार्ह॑पत्यं॒ मन्थे॑त्।

विच्छि॑न्द्यात्।

भ्रातृ॑व्यमस्मै जनयेत्।

यद्वै य॒ज्ञस्य॑ वास्त॒व्यं क्रि॑यते॑।

तदनु॑ रु॒द्रोऽव॑चरति।

यत्पूर्व॑मन्वव॒स्येत्।

वा॒स्त॒व्यम॑ग्निमुपा॑सीत।

रु॒द्रोऽस्य॑ प॒शून्धातु॑कः स्यात्।

आ॒ह॒वनी॒यमु॑द्वाप्य॑।

गार्ह॑पत्यं मन्थेत् ॥ 23 ॥

इ॒तः प्र॑थ॒मं ज॑ज्ञे अ॒ग्निः।

स्वाद्यो॑ने॒रधि॑ जा॒तवे॑दाः।

स गा॑यत्रि॒या त्रि॑ष्टुभा॒ जग॑त्या।

दे॒वेभ्यो॑ ह॒व्यं व॑हतु प्रजा॒नत्रि॑ति।

छन्द्वा॑भिरे॒वैन॒ग्ग् स्वाद्यो॑नेः प्रज॑नयति।

गार्ह॑पत्यं मन्थति।

गार्ह॑पत्यं वा अन्वाहि॑ताग्नेः प॒शव॑ उप॑तिष्ठन्ते।

स यदु॑द्वायति।

तदनु॑ प॒शवोऽपं॑ क्रामन्ति।

इ॒षे र॒य्यै र॑मस्व ॥ 24 ॥

सह॑से द्यु॒म्नाय॑।

ऊ॒र्जे प॒त्याये॒त्याह॑।

प॒शवो॒ वै र॒यिः।

प॒शूने॒वास्मै॑ रमयति।

सा॒र॒स्व॒तौ त्वो॒थ्सौ॒ समि॑न्धाता॒मित्या॑ह।

ऋ॒क्सामे॒ वै सा॑र॒स्व॒तावु॒थ्सौ॑।

ऋ॒क्सामा॒भ्यामे॒वैन॒गं॒ समि॑न्धे।

स॒म्राड॑सि वि॒राड॒सीत्या॑ह।

र॒थ॒न्तरं॑ वै स॒म्राट्।

बृ॒हद्वि॒राट् ॥ 25 ॥

ता॒भ्यामे॒वैन॒गं॒ समि॑न्धे।

व॒ज्रो॒ वै च॒क्रम्।

व॒ज्रो॒ वा ए॒तस्य॑ य॒ज्ञं वि॒च्छि॑नत्ति।

यस्या॑नो॒ वा र॒थो॒ वाऽन्त॒राऽग्नी॑ याति।

आ॒ह॒व॒नीय॑मु॒द्वाप्य॑।

गा॒र्ह॑प॒त्यादु॒द्धरे॑त्।

यद॑ग्ने॒ पूर्वं॑ प्रभृ॒तं प॒दगं॑ हि तै॑।

सूर्य॑स्य र॒श्मी॑न॒न्वा॑त॒तानं॑।

तत्र॑ रयि॒ष्ठाम॒नु सम्भ॑रै॒तम् ।
सं नः॑ सृज॒ सुम॒त्या वाज॑व॒त्येति॑ ॥ 26 ॥

पूर्वे॑णै॒वास्य॑ य॒ज्ञेन॑ य॒ज्ञम॒नु सं त॑नोति ।
त्वम॑ग्रे स॒प्रथा॑ अ॒सीत्या॑ह ।
अ॒ग्निः सर्वा॑ दे॒वताः॑ ।
दे॒वता॑भिरे॒व य॒ज्ञं सं त॑नोति ।
अ॒ग्नये॑ पथि॒कृते॑ पुरो॒डाश॑म॒ष्टाक॑पालं॒ निर्व॑पेत् ।
अ॒ग्निमे॒व प॑थि॒कृत॑ग्ग् स्वेन॑ भाग॒धेये॒नोप॑ धावति ।
स ए॒वैनं॑ य॒ज्ञियं॑ पन्था॒मपि॑ नयति ।
अ॒न॒ङ्घ्रि॒न्दक्षि॑णा ।
व॒ही ह्ये॑ष समृ॒द्ध्यै ॥ 27 ॥

हर॒त्यथा॑ग्नि॒होत्रं॑ नि॒म्रोच॑ति हरे॒देवता॑
गच्छ॑त्यु॒द्वाये॑न्मन्थे॒द्रम॑स्व बृह॒द्विरा॑डिति॒ नवं च ॥ 4 ॥

नि वै पूर्वं॑ त्रीणि॑ नि॒म्रोच॑ति॒ दर्भे॑ण॒ यद्वि॑र॒ण्यम॑ग्नि॒होत्रं॑
पुन॑र्वरु॒णो वा॒रुणं॑ नि वा ए॒तस्या॒भ्युदे॑ति॒ चतु॑र्गृही॒तमा॒ज्यं
यदा॒ज्यं परा॑च्युषाः पुन॑र्मि॒त्रो मै॒त्रं यस्या॑हव॒नीये॒ऽनु॑द्वाते॒
गा॒र्हप॑त्ये॒ यद्वै म॑न्थे॒दुद्धरे॑त् ॥

यस्य॑ प्रा॒तस्स॑व॒ने सोमो॑ऽति॒रिच्य॑ते ।
माध्य॑न्दि॒नं स॑वंनं का॒मय॑मानो॒ऽभ्यति॑रिच्यते ।
गौर्ध॑यति म॒रुता॑मिति॒ धय॑द्वतीषु कुर्वन्ति ।
हि॒नस्ति॒ वै स॒न्ध्य॑धी॒तम् ।

स॒न्धी॒व॒ खलु॒ वा ए॒तत् ।
यथ्स॒व॒न॒स्याति॒रिच्य॑ते ।
यद्ध॒य॑द्व॒तीषु॑ कुर्वन्ति ।
स॒न्धेः॑ शान्त्यै॑ ।
गा॒य॒त्र॒गं॑ सा॒मं भ॒वति॑ पञ्च॒द॒शः॑ स्तोमः ।
तेनै॒व प्रा॑तस्स॒व॒नान्न॑ यन्ति ॥ 28 ॥

म॒रु॒त्व॑तीषु कुर्वन्ति ।
तेनै॒व मा॒ध्य॑न्दि॒नाथ्स॒व॒नान्न॑ यन्ति ।
होतु॑श्चम॒सम॑नून्नयन्ते ।
होताऽनु॑शगंसति ।
म॒ध्य॒त ए॒व य॒ज्ञं स॒माद॑धाति ।
यस्य॒ मा॒ध्य॑न्दि॒ने स॒व॒ने सोमो॑ऽतिरिच्यते ।
आ॒दि॒त्यं तृ॑तीयस॒व॒नं का॒मय॑मानोऽभ्यतिरिच्यते ।
गौ॒रि॒वी॒त॒गं॑ सा॒मं भ॒वति॑ ।
अति॑रिक्तं वै गौ॒रि॒वी॒त॒म् ।
अति॑रिक्तं यथ्स॒व॒न॒स्याति॒रिच्य॑ते ॥ 29 ॥

अति॑रिक्तस्य॒ शान्त्यै॑ ।
ब॒ण्म॒हा॒गं अ॑सि सूर्येति॑ कुर्वन्ति ।
यस्यै॒वादि॒त्यस्य॒ स॒व॒न॒स्य का॒मे॒नाति॒रिच्य॑ते ।
तेनै॒वैनं॒ का॒मे॒न॒ सम॑र्धयन्ति ।

गौरि॒वी॒त॒ग्ं॒ सामं॑ भवति।
 तेनै॒व मा॒ध्य॑न्दि॒ना॒थ्स॑व॒नान्न॑ य॒न्ति।
 स॒प्त॒द॒शः॑ स्तोमः।
 तेनै॒व तृ॑तीयस॒वनान्न॑ य॒न्ति।
 होतुं॑श्चम॒सम॑नू॒न्न॑यन्ते।
 होताऽनु॑श॒ग्ंस॑ति ॥ 30 ॥

म॒ध्य॒त ए॒व य॒ज्ञ॒ग्ं स॒मा॒द॑धाति।
 यस्य॑ तृ॒तीय॑स॒वने॒ सोमो॑ति॒रि॒च्ये॑त।
 उ॒क्थ्यं॑ कुर्वीत।
 यस्यो॒क्थ्ये॑ऽति॒रि॒च्ये॑त।
 अ॒ति॒रा॒त्रं कु॑र्वीत।
 यस्या॑ति॒रा॒त्रेऽति॒रि॒च्ये॑ते।
 तत्त्वै॑ दु॒ष्प्र॒ज्ञान॑म्।
 यज॑मानं॒ वा ए॒तत्प॒श॒वं आ॒सा॒ह्यं॑ यन्ति।
 बृ॒ह॒त्सामं॑ भवति।
 बृ॒ह॒द्वा इ॒मान् लो॒का॒न्दा॑धार।
 बा॒र्ह॑ताः प॒श॒वः।
 बृ॒ह॒तै॒वा॒स्मै प॒शू॒न्दा॑धार।
 शि॒पि॒वि॒ष्ट॒व॒तीषु॑ कुर्वन्ति।
 शि॒पि॒वि॒ष्टो॑ वै दे॒वानां॑ पु॒ष्टम्॑।

पुष्ट्यैवैन॒गं॒ सम॑र्धयन्ति ।
 होतु॑श्चम॒सम॒नून्न॑यन्ते ।
 होताऽनु॑शगंसति ।
 म॒ध्य॒त ए॒व य॒ज्ञगं॑ स॒माद॑धाति ॥ 31 ॥

य॒न्ति स॒र्व॒न॒स्याति॒रिच्य॑ते शगंसति दाधारा॒ष्टौ च॑ ॥ 5 ॥

ए॒कैको॒ वै ज॒नता॑या॒मिन्द्रः॑ ।
 एकं॒ वा ए॒ताविन्द्र॑म॒भि स॒गंसु॑नुतः ।
 यौ द्वौ स॒गंसु॑नुतः ।
 प्र॒जाप॑ति॒र्वा ए॒ष वि॒ताय॑ते ।
 यद्य॒ज्ञः ।
 तस्य॒ ग्रावा॑णो॒ दन्ताः॑ ।
 अ॒न्य॒तरं॑ वा ए॒ते स॒गंसु॑न्व॒तोर्निर्ब॑प्सति ।
 पूर्वे॑णोप॒सृत्या॑ दे॒वता॒ इत्या॑हुः ।
 पूर्॒वोप॑सृतस्य॒ वै श्रेया॑न्भवति ।
 ए॒ति॒व॒न्त्याज्या॑नि भवन्त्य॒भिजि॑त्यै ॥ 32 ॥

म॒रुत्व॑तीः प्र॒तिप॑दः ।
 म॒रुतो॒ वै दे॒वाना॑म॒परा॑जितमा॒यत॑नम् ।
 दे॒वाना॑मे॒वाप॑राजित आ॒यत॑ने यतते ।
 उ॒भे बृ॑ह॒द्रथ॑न्त॒रे भ॑वतः ।
 इ॒यं वाव॑ र॒थन्त॑रम् ।

अ॒सौ बृ॒हत्।
आ॒भ्यामे॒वैन॑म॒न्तरे॑ति।
वा॒चश्च॒ मन॑सश्च।
प्रा॒णाच्चा॑पा॒नाच्च॑।
दि॒वश्च॑ पृथि॒व्याश्च॑ ॥ 33 ॥

सर्व॑स्माद्वि॒त्ताद्वे॒द्यात्।
अ॒भि॒व॒र्तो ब्र॑ह्मसा॒मं भव॑ति।
सु॒व॒र्गस्य॑ लो॒कस्या॒भिवृ॑त्त्यै।
अ॒भि॒जि॒द्भव॑ति।
सु॒व॒र्गस्य॑ लो॒कस्या॒भिजि॑त्यै।
वि॒श्वजि॑द्भवति।
वि॒श्वस्य॑ जि॒त्यै।
यस्य॑ भू॒याग्ँसो॑ यज्ञ॒क्र॒तव॑ इत्याहुः।
स दे॒वता॑ वृ॒ङ्क्ते॒ इति॑।
यद्य॑ग्नि॒ष्टोमः॑ सोमः॑ प॒रस्ता॑थस्यात् ॥ 34 ॥

उ॒क्थ्यं॑ कुर्वीत।
यद्यु॒क्थ्यः॑ स्यात्।
अ॒ति॒रा॒त्रं कु॑र्वीत।
यज्ञ॒क्र॒तुभि॑रे॒वास्य॑ दे॒वता॑ वृ॒ङ्क्ते।
यो वै छ॒न्दो॑भिरभिभवति।

स स॒ग्ं॑सु॒न्व॒तो॒र॒भि॒भ॑वति ।
 सं॒वे॒शा॒य॑ त्वो॒प॒वे॒शा॒य॒ त्वे॒त्या॑ह ।
 छ॒न्दा॒ग्ं॑सि॒ वै सं॒वे॒श॑ उ॒प॒वे॒शः॑ ।
 छ॒न्दा॑भि॒रे॒वा॒स्य॒ छ॒न्दा॒ग्ं॑स्य॒भि॒भ॑वति ।
 इ॒ष्ट॒र्गो॒ वा ऋ॒त्वि॒जा॑म॒ध्व॒र्युः ॥ 35 ॥

इ॒ष्ट॒र्गः॑ ख॒लु॒ वै पू॒र्वो॒ऽष्टुः॑ क्षी॒य॑ते ।
 प्रा॒णा॑पा॒नो मृ॒त्यो॒र्मा पा॒त॒मि॒त्या॑ह ।
 प्रा॒णा॒पा॒नयो॑रे॒व श्र॑यते ।
 प्रा॒णा॑पा॒नो मा मा॑ हा॒सि॒ष्ट॒मि॒त्या॑ह ।
 नै॒नं पु॒रा॒ऽऽयु॑षः प्रा॒णा॒पा॒नो ज॑हितः ।
 आ॒र्ति॑ वा ए॒ते नि॒य॑न्ति ।
 येषां॑ दी॒क्षि॒तानां॑ प्र॒मी॒य॑ते ।
 तं यद॑व॒व॒र्जे॑युः ।
 कृ॒र॒कृ॒ता॑मि॒वैषां॑ लो॒कः स्या॑त् ।
 आ॒ह॑र॒ द॒हे॒ति ब्रू॑यात् ॥ 36 ॥

तं द॑क्षि॒ण॒तो वे॒द्यै नि॒धा॒य॑ ।
 सर्प॑रा॒ज्ञियां॑ ऋ॒ग्भिः॑ स्तु॒युः ।
 इ॒यं वै सर्प॑तो॒ राज्ञी॑ ।
 अ॒स्या ए॒वैनं॑ परि॒द॑दति ।
 व्यृ॒द्धं तदि॒त्या॑हुः ।

यथस्तुतमननुशस्तमिति।
 होता॑ प्रथमः प्राचीनावीती मा॑र्जा॒लीयं॑ परीयात्।
 या॒मीर॑नुब्रुवन्।
 सर्प॒रा॒ज्ञीनां॑ कीर्तयेत्।
 उ॒भयो॑रे॒वैनं॑ लो॒कयोः॑ परि॒ददति॑ ॥ 37 ॥

अथो॑ धुवन्त्ये॒वैन॑म्।
 अथो॑ न्ये॒वास्मै॑ हुवते।
 त्रिः॑ परि॒यन्ति॑।
 त्रयं॑ इ॒मे लो॒काः।
 ए॒भ्य ए॒वैनं॑ लो॒केभ्यो॑ धुवते।
 त्रिः॑ पुनः॒ परि॒यन्ति॑।
 षट्थ॑सम्पद्यन्ते।
 षड्वा ऋ॒तवः॑।
 ऋ॒तुभि॑रे॒वैनं॑ धुवते।
 अग्र॒ आयू॑र्गं॒षि पव॑स॒ इति॑ प्रति॒पदं॑ कुर्वीरन्।
 र॒थ॒न्त॒रसा॑मैषा॒गं सोमः॑ स्यात्।
 आयु॑रे॒वात्म॑न्दधते।
 अथो॑ पा॒प्मान॑मे॒व वि॒जह॑तो यन्ति ॥ 38 ॥

अ॒भिजि॑त्यै पृथि॒व्याश्च॑ स्याद॑ध्व॒र्युर्ब्रूया॑ल्लो॒कयोः॑
 परि॑ददति कुर्वीर॒ग्ं स्त्रीणि॑ च ॥ 6 ॥

अ॒सुर्यं॑ वा ए॒तस्मा॒द्वर्णं॑ कृ॒त्वा।
 प॒शवो॑ वी॒र्यम॑प॒क्राम॑न्ति।
 यस्य॑ यू॒पो वि॒रोह॑ति।
 त्वा॒ष्ट्रं बहु॑रूप॒माल॑भेत।
 त्वष्टा॑ वै रू॒पाणा॑मीशे।
 य ए॒व रू॒पाणा॑मीशे॑।
 सोऽस्मि॑न्प॒शून् वी॒र्यं॑ यच्छति।
 नास्मा॑त्प॒शवो॑ वी॒र्यम॑प॒ क्राम॑न्ति।
 आ॒र्तिं वा ए॒ते निय॑न्ति।
 येषां॑ दी॒क्षिताना॑म॒ग्निरु॒द्वाय॑ति ॥ 39 ॥

यदा॑हव॒नीयं॑ उ॒द्वाये॑त्।
 यत्तं॑ म॒न्थे॑त्।
 विच्छि॑न्द्यात्।
 भ्रातृ॑व्यम॒स्मै जन॑येत्।
 यदा॑हव॒नीयं॑ उ॒द्वाये॑त्।
 आ॒ग्नी॑द्घ्रा॒दुद्ध॑रेत्।
 यदा॑ग्नी॑द्घ्र उ॒द्वाये॑त्।
 गार्ह॑पत्या॒दुद्ध॑रेत्।
 यद्गार्ह॑पत्य उ॒द्वाये॑त्।
 अत॑ ए॒व पुन॑र्मन्थेत् ॥ 40 ॥

अत्र वाव स निलयते।
 यत्र खलु वै निलीनमुत्तमं पश्यन्ति।
 तदेनमिच्छन्ति।
 यस्माद्दारोरुद्वायेत्।
 तस्यारणी कुर्यात्।
 क्रुमुकमपि कुर्यात्।
 एषा वा अग्नेः प्रिया तनूः।
 यत्क्रुमुकः।
 प्रिययैवैनं तनुवा समर्धयति।
 गार्हपत्यं मन्थति ॥ 41 ॥

गार्हपत्यो वा अग्नेर्योनिः।
 स्वादेवैनं योनेर्जनयति।
 नास्मै भ्रातृव्यं जनयति।
 यस्य सोमं उपदस्येत्।
 सुवर्णगं हिरण्यं द्वेधा विच्छिद्य।
 ऋजीषेऽन्यदा धूनुयात्।
 जुहुयादन्यत्।
 सोममेवाभिषुणोति।
 सोमं जुहोति।

सोमस्य वा अ॒भिषू॒यमाणस्य प्रि॒या
त॒नू॒रु॒द॒क्रामत् ॥ 42 ॥

तथ्सु॒वर्ण॒गुं॒ हिर॑ण्यमभवत्।
यथ्सु॒वर्ण॒गुं॒ हिर॑ण्यं कुर्वन्ति।
प्रि॒ययै॒वैनं॑ त॒नुवा॒ सम॑र्धयन्ति।
यस्या॒क्री॒त॒गुं॒ सोम॑मप॒हरै॑युः।
क्री॒णी॒यादे॒व।
सैव॑ ततः प्रायश्चित्तिः।
यस्य॑ क्री॒तम॑प॒हरै॑युः।
आ॒दा॒रा॒ग्श्च॑ फाल्गु॒नानि॑ चा॒भिषु॑णुयात्।
गा॒य॒त्री॒ यग्ं॑ सोम॒माह॑रत्।
तस्य॑ योऽग्ं॑शुः प॒राऽप॑तत् ॥ 43 ॥

त आ॒दा॒रा अ॑भवन्।
इन्द्रो॑ वृ॒त्रम॑हन्।
तस्य॑ व॒ल्कः॑ प॒राऽप॑तत्।
तानि॑ फाल्गु॒नान्य॑भवन्।
प॒शवो॑ वै फाल्गु॒नानि॑।
प॒शवः॑ सोमो॒ राजा॑।
यदा॑दा॒रा॒ग्श्च॑ फाल्गु॒नानि॑ चाभिषु॒णोति॑।
सोम॑मे॒व राजा॑नम॒भिषु॑णोति।

श्रु॒तेन॑ प्रा॒तस्स॒वने॑ श्री॒णीयात्॑ ।
द॒ध्ना म॒ध्यन्दि॑ने ॥ 44 ॥

नी॒तमि॒श्रेण॑ तृ॒तीयस॒वने॑ ।
अ॒ग्नि॒ष्टोमः॑ सोमः॑ स्याद्रथन्त॒रसा॑मा ।
य ए॒वत्वि॑जो वृ॒ताः स्युः॑ ।
त ए॒नं या॑जयेयुः ।
एकां॑ गां दक्षि॑णां दद्या॒त्तेभ्य॑ ए॒व ।
पुनः॑ सोमं॑ क्रीणीयात् ।
य॒ज्ञेनै॒व तद्य॒ज्ञमिच्छ॑ति ।
सैव॑ ततः॒ प्रायश्चि॑त्तिः ।
सर्वा॑भ्यो॒ वा ए॒ष दे॒वता॑भ्यः॒ सर्वे॑भ्यः
पृ॒ष्ठेभ्य॑ आ॒त्मान॑मागु॒रते॑ ।
यः स॒त्त्वाया॑गु॒रते॑ ।
ए॒तावा॒न्खलु॑ वै पु॒रुषः॑ ।
याव॑दस्य वि॒त्तम् ।
स॒र्ववे॒दसे॑न॒ यजे॑त ।
सर्व॑पृ॒ष्ठोऽस्य॑ सोमः॑ स्यात् ।
सर्वा॑भ्य ए॒व दे॒वता॑भ्यः॒ सर्वे॑भ्यः पृ॒ष्ठेभ्य॑
आ॒त्मानं॑ निष्क्री॑णीते ॥ 45 ॥

उ॒द्वाय॑ति मन्थेन्मन्थत्यक्रामत्प॒राऽप॑तन्मध्यन्दि॒न
आगुर॑ते पञ्च॒ च ॥ 7 ॥

पव॑मानः सुव॒र्जनः॑ ।
प॒वित्रे॑ण विच॑र्षणिः ।
यः पो॒ता स पु॑नातु मा ।
पुन॑न्तु मा देवज॒नाः ।
पुन॑न्तु मन॑वो धि॒या ।
पुन॑न्तु विश्व॑ आ॒यवः॑ ।
जा॒त॑वेदः प॒वित्र॑वत् ।
प॒वित्रे॑ण पुनाहि मा ।
शु॒क्रेण॑ देव॒ दीद्य॑त् ।
अग्ने॒ ऋत्वा॒ ऋतू॑ग॒रनु॑ ॥ 46 ॥

यत्ते॑ प॒वित्र॑म॒र्चिषि॑ ।
अग्ने॒ वित॑तमन्तरा ।
ब्रह्म॒ तेन॑ पुनीमहे ।
उ॒भाभ्यां॑ देव सवितः ।
प॒वित्रे॑ण स॒वेन॑ च ।
इ॒दं ब्रह्म॑ पुनीमहे ।
वैश्व॑दे॒वी पु॑न॒ती दे॒व्यागा॑त् ।
यस्यै॑ ब॒ह्वीस्त॒नुवो॑ वी॒तपृ॑ष्ठाः ।

तया॒ मद॑न्तः सध॒ माद्यै॑षु।
व॒यग्ग्॑ स्या॑म॒ पत॑यो रयी॒णाम् ॥ 47 ॥

वै॒श्वान॒रो र॒श्मिभि॑र्मा पुनातु।
वातः॑ प्रा॒णेने॑षि॒रो म॑यो॒भूः।
द्यावा॑पृथि॒वी पय॑सा॒ पयो॑भिः।
ऋ॒ताव॑री य॒ज्ञिये॑ मा पुनीताम्।
बृ॒हद्भिः॑ सवित॒स्तृभिः॑।
वर्षि॑ष्ठैर्दे॒व म॑न्म॒भिः।
अग्ने॑ दक्षैः॑ पुनाहि मा।
येन॑ दे॒वा अपु॑नत।
येनापो॑ दि॒व्यं कशः॑।
तेन॑ दि॒व्येन॒ ब्रह्म॑णा ॥ 48 ॥

इ॒दं ब्रह्म॑ पुनीमहे।
यः पा॑वमा॒नीर॒ध्येति॑।
ऋषि॑भिः॒ सम्भृ॑त॒गुं रस॑म्।
सर्व॑गुं स पू॒तम॑श्नाति।
स्व॒दि॒तं मा॑त॒रिश्च॑ना।
पा॒वमा॒नीर्यो॑ अ॒ध्येति॑।
ऋषि॑भिः॒ सम्भृ॑त॒गुं रस॑म्।
तस्मै॑ सर॒स्वती॑ दुहे।

क्षी॒र॒गं॑ स॒र्पि॒र्मधू॑द॒कम् ।
पा॒व॒मा॒नीः॑ स्व॒स्त्य॑य॒नीः॑ ॥ 49 ॥

सु॒दु॒घा॒ हि॒ प॒य॑स्व॒तीः ।
ऋ॒षि॑भिः॒ सम्भृ॑तो॒ रसः॑ ।
ब्रा॒ह्म॒णेष्व॑मृ॒त॒गं॑ हि॒तम् ।
पा॒व॒मा॒नीर्दि॑शन्तु॒ नः ।
इ॒मं लो॒क॒मथो॑ अ॒मुम् ।
का॒मा॒न्त्स॒म॑र्ध॒यन्तु॑ नः ।
दे॒वीर्दे॒वैः स॒माभृ॑ताः ।
पा॒व॒मा॒नीः॑ स्व॒स्त्य॑य॒नीः॑ ।
सु॒दु॒घा॒ हि॒ घृ॑त॒श्चु॑तः ।
ऋ॒षि॑भिः॒ सम्भृ॑तो॒ रसः॑ ॥ 50 ॥

ब्रा॒ह्म॒णेष्व॑मृ॒त॒गं॑ हि॒तम् ।
येन॑ दे॒वाः प॒वि॒त्रेण॑ ।
आ॒त्मानं॑ पु॒न॒ते॒ सदा॑ ।
तेन॑ स॒हस्र॑धा॒रेण॑ ।
पा॒व॒मा॒न्यः पु॑नन्तु॒ मा ।
प्रा॒जा॒प॒त्यं प॒वि॒त्रम् ।
श॒तो॒द्या॑म॒गं हि॒र॒ण्म॑यम् ।
तेन॑ ब्रह्म॒विदो॑ व॒यम् ।

पू॒तं ब्र॒ह्मं पु॒नीम॑हे ।
 इन्द्रः॑ सु॒नी॒ती स॒ह मां पु॒नातु॑ ।
 सोमः॑ स्व॒स्त्या वरु॑णः स॒मी॒च्या ।
 य॒मो रा॒जा प्र॑मृ॒णाभिः॑ पु॒नातु॑ मा ।
 जा॒तवे॑दा मो॒र्जय॑न्त्या पु॒नातु॑ ॥ 51 ॥

अनु॑ रयी॒णां ब्र॒ह्मणा॑ स्व॒स्त्यय॑नीः सु॒दुघा॑ हि घृ॒तश्चु॑त
 ऋषि॑भिः स॒म्भृ॒तो रसः॑ पु॒नातु॑ त्री॒णां च ॥ 8 ॥

प्र॒जा वै स॒त्रमा॑स॒त तप॑स्तप्य॒माना॑ अ॒जु॒ह्वतीः॑ ।
 दे॒वा अप॑श्यञ्चम॒सं घृ॒तस्य॑ पूर्ण॒ग्ग् स्व॒धाम् ।
 तमु॒पोद॑तिष्ठन्तम॒जुह॑वुः ।
 तेना॑र्धमा॒स ऊ॒र्जम॑वा॒रुन्ध॑त ।
 तस्मा॑दर्धमा॒से दे॒वा इ॒ज्यन्ते॑ ।
 पि॒तरौ॑ऽपश्यञ्चम॒सं घृ॒तस्य॑ पूर्ण॒ग्ग् स्व॒धाम् ।
 तमु॒पोद॑तिष्ठन्तम॒जुह॑वुः ।
 तेन॑ मा॒स्यूर्ज॑मवा॒रुन्ध॑त ।
 तस्मा॑न्मा॒सि पि॒तृभ्यः॑ क्रियते ।
 म॒नुष्या॑ अपश्यञ्चम॒सं घृ॒तस्य॑ पूर्ण॒ग्ग्
 स्व॒धाम् ॥ 52 ॥

तमु॒पोद॑तिष्ठन्तम॒जुह॑वुः ।
 तेन॑ द्व॒यीमूर्ज॑मवा॒रुन्ध॑त ।

तस्माद्द्विरहो मनुष्येभ्य उपहियते।
 प्रातश्च सायं च।
 पशवोऽपश्यञ्चमसं घृतस्य पूर्णग्ं स्वधाम्।
 तमुपोदतिष्ठन्तमजुहवुः।
 तेन त्रयीमूर्जमवारुन्धत।
 तस्मात्त्विरहः पशवः प्रेरते।
 प्रातः सङ्गवे सायम्।
 असुरा अपश्यञ्चमसं घृतस्य पूर्णग्ं
 स्वधाम् ॥ 53 ॥

तमुपोदतिष्ठन्तमजुहवुः।
 तेन संवत्सर ऊर्जमवारुन्धत।
 ते देवा अमन्यन्त।
 अमी वा इदमभूवन्।
 यद्वयग्ंस्म इति।
 त एतानि चातुर्मास्यान्यपश्यन्।
 तानि निरवपन्।
 तैरेवैषां तामूर्जमवृञ्जत।
 ततो देवा अभवन्।
 पराऽसुराः ॥ 54 ॥

यद्यज॑ते।

यामे॒व दे॒वा ऊ॒र्ज॑म॒वारु॑न्धत।

तां ते॒नाव॑रुन्धे।

यत्पि॒तृभ्यः॑ क॒रोति॑।

यामे॒व पि॒तर॑ ऊ॒र्ज॑म॒वारु॑न्धत।

तां ते॒नाव॑रुन्धे।

यदा॑वस॒थेऽन्न॑गुं ह॒रन्ति॑।

यामे॒व म॑नु॒ष्या॑ ऊ॒र्ज॑म॒वारु॑न्धत।

तां ते॒नाव॑रुन्धे।

यद्दक्षि॑णां ददा॑ति ॥ 55 ॥

यामे॒व प॒शव॑ ऊ॒र्ज॑म॒वारु॑न्धत।

तां ते॒नाव॑रुन्धे।

यच्चा॑तुर्मा॒स्यैर्य॑जते।

यामे॒वासु॑रा ऊ॒र्ज॑म॒वारु॑न्धत।

तां ते॒नाव॑रुन्धे।

भव॑त्या॒त्मना॑।

परा॑ऽस्य॒ भ्रातृ॑व्यो भवति।

वि॒राजो॑ वा ए॒षा वि॒क्रान्तिः॑।

यच्चा॑तुर्मा॒स्यानि॑।

वैश्व॑दे॒वेना॒स्मिन्लो॒के प्रत्य॑तिष्ठत्।

वरुणप्रघासैरन्तरिक्षे ।
साकमेधैरमुष्मिन्लोके ।
एष हृत्वावै तथ्सर्वं भवति ।
य एवं विद्वाग्श्चातुर्मास्यैर्यजते ॥ 56 ॥

मनुष्या अपश्यञ्चमसं घृतस्यं पूर्णग्ं स्वधामसुरा
अपश्यञ्चमसं घृतस्यं पूर्णग्ं स्वधामसुरा
ददात्यतिष्ठच्चत्वारिं च ॥ 9 ॥

अग्निर्वाव संवत्सरः ।
आदित्यः परिवत्सरः ।
चन्द्रमा इदावत्सरः ।
वायुरनुवत्सरः ।
यद्वैश्वदेवेन यजते ।
अग्निमेव तथ्संवत्सरमाप्नोति ।
तस्माद्वैश्वदेवेन यजमानः ।
संवत्सरीणाग्ं स्वस्तिमाशास्तु इत्याशासीत ।
यद्वरुणप्रघासैर्यजते ।
आदित्यमेव तत्परिवत्सरमाप्नोति ॥ 57 ॥

तस्माद्वरुणप्रघासैर्यजमानः ।
परिवत्सरीणाग्ं स्वस्तिमाशास्तु इत्याशासीत ।
यथसाकमेधैर्यजते ।

च॒न्द्रम॑समे॒व तदि॑दाव॒थ्स॒रमा॑प्रोति ।
 तस्मा॑त्साकमे॒धैर्य॑ज॒मानः॑ ।
 इ॒दाव॒थ्स॒रीणाग्ं॑ स्व॒स्तिमाशा॑स्त॒ इत्याशा॑सीत ।
 यत्पि॑तृ॒यज्ञे॒न य॑ज॒ते ।
 दे॒वाने॒व तद॒न्वव॑स्यति ।
 अथ॒ वा अ॑स्य वा॒युश्च॑ानुव॒थ्स॒रश्चा॒प्रीता॒वुच्छि॑ष्येते ।
 यच्छु॑नासी॒रीये॑ण॒ यज॑ते ॥ 58 ॥

वा॒युमे॒व तद॑नुव॒थ्स॒रमा॑प्रोति ।
 तस्मा॑च्छु॒नासी॒रीये॑ण॒ यज॑मानः ।
 अ॒नुव॒थ्स॒रीणाग्ं॑ स्व॒स्तिमाशा॑स्त॒ इत्याशा॑सीत ।
 सं॒व॒थ्स॒रं वा ए॒ष ई॒प्स॒तीत्या॑हुः ।
 यश्चा॑तु॒र्मा॒स्यैर्य॑ज॒त॒ इति॑ ।
 ए॒ष ह॒ त्वै सं॑व॒थ्स॒रमा॑प्रोति ।
 य ए॒वं वि॒द्वाग्श्चा॑तु॒र्मा॒स्यैर्य॑ज॒ते ।
 विश्वे॑ दे॒वाः सम॑यजन्त ।
 ते॑ऽग्निमे॒वाय॑जन्त ।
 त ए॒तं लो॒कम॑जयन् ॥ 59 ॥

यस्मि॑न्न॒ग्निः॑ ।
 यद्वै॑श्वदे॒वेन॒ यज॑ते ।
 ए॒तमे॒व लो॒कं ज॑यति ।

यस्मिन्नग्निः।

अग्नेरेव सायुज्यमुपैति।

यदा वैश्वदेवेन यजते।

अथ संवत्सरस्य गृहपतिमाप्नोति।

यदा संवत्सरस्य गृहपतिमाप्नोति।

अथ सहस्रयाजिनमाप्नोति।

यदा सहस्रयाजिनमाप्नोति ॥ 60 ॥

अथ गृहमेधिनमाप्नोति।

यदा गृहमेधिनमाप्नोति।

अथाग्निर्भवति।

यदाऽग्निर्भवति।

अथ गौर्भवति।

एषा वै वैश्वदेवस्य मात्रा।

एतद्वा एतेषामवमम्।

अतोऽतो वा उत्तराणि श्रेयागंसि भवन्ति।

यद्विश्वे देवाः समयजन्त।

तद्वैश्वदेवस्य वैश्वदेवत्वम् ॥ 61 ॥

अथादित्यो वरुणगुं राजानं

वरुणप्रघासैरयजत।

स एतं लोकमजयत्।

यस्मिन्नादित्यः।
 यद्वरुणप्रघासैर्यजते।
 एतमेव लोकं जयति।
 यस्मिन्नादित्यः।
 आदित्यस्यैव सायुज्यमुपैति।
 यदादित्यो वरुणगुं राजानं
 वरुणप्रघासैर्यजत।
 तद्वरुणप्रघासानां वरुणप्रघासत्वम्।
 अथ सोमो राजा छन्दागंसि
 साकमेधैर्यजत ॥ 62 ॥

स एतं लोकमजयत्।
 यस्मिग्ग्श्चन्द्रमा विभाति।
 यथसाकमेधैर्यजते।
 एतमेव लोकं जयति।
 यस्मिग्ग्श्चन्द्रमा विभाति।
 चन्द्रमस एव सायुज्यमुपैति।
 सोमो वै चन्द्रमाः।
 एष ह त्वै साक्षात्सोमं भक्षयति।
 य एवं विद्वान्त्साकमेधैर्यजते।
 यत्सोमंश्च राजा छन्दागंसि च समैधन्त ॥ 63 ॥

तथसाकमेधानाग्ं साकमेधत्वम्।
अथर्तवः पितरः प्रजापतिं पितरं
पितृयज्ञेनायजन्त।

त एतं लोकमजयन्।

यस्मिन्नृतवः।

यत्पितृयज्ञेन यजते।

एतमेव लोकं जयति।

यस्मिन्नृतवः।

ऋतूनामेव सायुज्यमुपैति।

यदृतवः पितरः प्रजापतिं पितरं
पितृयज्ञेनायजन्त।

तत्पितृयज्ञस्य पितृयज्ञत्वम् ॥ 64 ॥

अथौषधय इमं देवं त्र्यम्बकैरयजन्त
प्रथेमहीति।

ततो वै ता अप्रथन्त।

य एवं विद्वाग्त्र्यम्बकैर्यजते।

प्रथते प्रजयां पशुभिः।

अथ वायुः परमेष्ठिनं शुनासीरीयेणायजत।

स एतं लोकमजयत्।

यस्मिन्वायुः।

यच्छु॑नासी॒रीये॑ण॒ यज॑ते।
 ए॒तमे॒व लो॒कं ज॑यति।
 यस्मि॑न्वा॒युः ॥ 65 ॥

वा॒योरे॒व सा॒यु॑ज्य॒मुपै॑ति।
 ब्र॒ह्मवा॒दिनो॑ वदन्ति।
 प्र चा॑तु॒र्मास्य॒याजी॒ मी॑य॒ता(३) न प्र॑मी॒यता(३) इति॑।
 जी॒वन्वा॒ एष ऋ॒तून॑प्येति।
 यदि॑ व॒सन्ता॑ प्र॒मीय॑ते।
 व॒सन्तो भ॑वति।
 यदि॑ ग्री॒ष्मे ग्री॒ष्मः।
 यदि॑ व॒र्षासु॑ व॒र्षाः।
 यदि॑ श॒रदि॑ श॒रत्।
 यदि॑ हे॒मन् हे॒मन्तः॑।
 ऋ॒तुर्भू॒त्वा सं॑व॒त्सर॑मप्येति।
 सं॒व॒त्सरः॑ प्र॒जाप॑तिः।
 प्र॒जाप॑ति॒र्वावि॑षः ॥ 66 ॥

प॒रि॒व॒त्सर॑मा॒प्नोति॑ शु॒नासी॒रीये॑ण॒ यज॑तेऽज॒यन्त्स॒हस्र॑या॒जिनं॑ -
 मा॒प्नोति॑ वै॒श्वदे॒वत्व॑गं सा॒कमे॒धैर॑यजत स॒मैध॑न्त
 पि॒तृय॑ज्ञ॒त्वं ज॑यति॒ यस्मि॑न्वा॒युर्हे॒मन्त॑स्त्रीणि॒ च ॥ 10 ॥

उ॒भये॑ यु॒वग्ं सु॒राम॑मु॒द॒स्था॒न्नि वै य॒स्य॑ प्रा॒तःस॒व॒न
ए॒कै॒कोऽसु॑र्यं प॒व॒मानः॑ प्र॒जा वै स॒त्रमा॑स॒ता॒ग्नि॒र्वाव
स॒व॒त्स॒रो द॑शं ॥ 10 ॥

उ॒भये॑ वा उ॒द॒स्था॒त्स॒र्वाभि॑र्म॒ध्यतो॑ऽत्र॒ वाव॑ ब्रा॒ह्म॒णेष्व॑थं
गृ॒हमे॒धि॒न॒ग्ं षट्॑र्ष॒ष्टिः ॥ 66 ॥

उ॒भये॑ वावैषः ॥

॥ हरिः ओ(३)म् ॥

॥ इति कृष्णयजुर्वेदीय तैत्तिरीय ब्राह्मणे प्रथमाष्टके चतुर्थः प्रश्नः समाप्तः ॥